

بِسْمِ اللَّهِ الرَّحْمَنِ الرَّحِيمِ

# KHUTBA JUMMAH

HAZRAT MUHYI-UD-DIN AL-KHALIFATULLAH

*Munir Ahmad Azim*

04 Décembre 2015 ~

(21 Safar 1437 Hijri)

**(Résumé Khutba)**

***Après ki li fine salué tous so bane disciples (et tous bane musulmans) entier le monde avec la salutation de paix dans l'Islam, Hadhrat Muhyi-ud-Din (atba) fine lire Tashahhud, Ta'uz, Surah Al Fatiha, et li fine ensuite cause lors « Mauvais L'Effet Télévision »:***

## **MAUVAIS L'EFFET TÉLÉVISION**

Azordi mo pou faire mo Khutba lors mauvais l'effet de télévision. Télévision en li même c'est ene faveur ki Allah (swt) fine faire pou nous. Tous bane faveurs ki Allah faire pou l'homme ena de bon coté, mais après ou trouve Shaytan doucement, doucement mette so trace partout, kot li gâte sa grand faveur ki Allah fine faire pou nous dans le dernier siècle ki fine passer et le nouveau siècle ki nous été. Ena bane programmes lors télévision li nécessaire ou guetter couma bane l'information ki pé donne ou, bane documentaires, bane programme éducatif et ena aussi bane les zot programmes.

Azordi bane dimounes, surtout bane jeunes népli content pou profite de bane bons programmes ki ena lors télévision. Eski ou pé réfléchi avec tant de senne télévision ki ena azordi ? Mo rappelle longtemps à Maurice ti ena ene seul senne télévision, bien éducatif, avec bane l'information, documentaire intéressant et ti ena ene l'heure ti commencer vers 3hrs p.m – 10.00 p.m, après switch off, péna aucaine programme, ki li de coté télévision et radio aussi. Après commié l'année après fine ena 2<sup>ème</sup> senne télévision et azordi ou capave compté commié senne ena, aparte senne télévision de Maurice, ou ena Canal +, pas conner ki les zot canal encore et avec senne My.T encore bane senne télévision encore. Récemment encore, My.T ti faire encore bane publicité film pendant 3 mois jusqu'à Octobre. Li fine donne plisse ki 73 senne télévision gratuite et après ou abonné avec li tous le mois et ou choisir bane films ki ou content pou guetter. Déjà là même céki mo apprane avec bane dimounes ki sa qualité senne ki ena là 24 lors 24, plusieurs serial en Indien pé donné ; ene fini l'autre commencer, aller même.

Donc maintenant céki ou remarquer tous divant télévision gramatin, tantôt. Si fine ratte bane film ki fine donner hier ou avant-hier, ena sa aussi ki ou prend ou remote, ou rode li et gagne film là pou guetter.

Donc pense bien bane croyants lors sa bane mauvais l'effet de télévision là. Azordi jour télévision dans ene la caze, li représente ene l'ennemi dangereux dans sa la caze là, ene l'ennemi ki pé lutter pou détruire ou *Imaan*, ou les temps, ou l'argent pou abonné pou gagne plusieurs senne malpropre et ou pé entraîne ou madames, ou bane zenfants dans sa bane mauvais l'effet de sa bane film immorale là et résultat de sa bane mauvais là, ou pou récolter bane mauvais même de coté ou madames, ou bane zenfants et finalement ou fine détruire ou l'honneur à travers sa bane mauvais film ki ou pé guetter. Kan ou attrape céki mauvais, céki veut dire ou fine largue céki bon. Boucou pas pé prend conte l'heure Namaz, récitation Quran avec traduction, Zikr, et bane bonne manière pé fini dans copier céki zot pé trouver dans films.

Donc chaque responsable dans la caze bizin conner, kot sa le monde là pé aller. Avec l'effet de télévision, boucou mauvais zaffaire pé ouvert l'esprit bane dimounes couma pou attaque ene dimoune, couma faire crimes, couma pou coquin, couma pou droguer, ki style bizin fume ene cigarette, couma pou vine ene zougadère, pou commence boire bane la boisson alcolic etc. – la liste là trop longue. Malgré tous dangers ki sa l'appareil là représente pou ou et ou la famille, ou pé encore gagne courage tolère so présence dans ou la caze. Si ou pé tolère li, alors cherche céki ou pou gagner de bon avec li, mais pas laisse li entraîne ou et ou la famille dans l'immoralité, et faire ou quitte le chemin ki Allah (swt) et So Rassool (saw) fine tracer pou ou dans sa le monde là. Ene vrai musulman croyant li supposé ene dimoune intelligent, ki conne faire la différence entre céki pou apporte li du bien et céki pou faire li du tort. Ene musulman pas juste suivre tendance, sans prend compte ki sa capave amène li jusqu'à so propre destruction dans sa le monde là et dans Aakhérat.

Bane *Kuffaar* ena dégoût pou Allah et So prophète (saw) et zot fine déclare l'ennementé contre l'Islam. Et Allah (swt) aussi fine ordonne bane musulmans pou ena dégoût pou bane *Kuffaar*. Quant à Télévision, li touye dégoût ki ou bizin ena pou bane l'ennemi de l'Islam, et li même faire ou, ou madame et ou bane zenfants content bane là. Li faire ou ena ou acteur préférer, ki li ene Hindu, Chrétien, Juif etc. Li faire ou gagne ou actrice préférer aussi, kot ena s.v.p mette zot photo dans zot la chambre, kot sa bane « *idols* » là capave athée etc.

Tous sa bane *Kuffaar* là, zot pas juste malpropre conceptionnellement, mais zot la vie aussi pas propre. Zot pé vivre zot la vie dans toute sorte qualité façons ki condamné par Allah (swt). Si mo alle décrire tous sa, sa capave vine longue kot la liste là pou dépasse Khutba!

Donc ou, ou bizin conner ki couma ou trouve zot dans film et c'est coumsa même zot la vie pou reflecter. En conséquence de sa, si ou pas content avec ene frère musulman couma ou, ou pas

pou guette so figure, ou pou traite li ene *Kafir*, ou pas pou faire li *Salaam*, ni pou boire ene verre de l'eau kot li et kitfois ou frère musulman li pé attache avec Allah So bane commandements et mette en pratique l'enseignement de nous bien-aimé prophète (saw). Pour li, ou traite li couma ou l'ennemie et kan ou vrai l'ennemi ki li pé souhaite ou destruction, destruction de l'Islam, et faire caricature de nous bien-aimé prophète (saw), sa ou gagne plaisir pou admire li danser, chanter etc. dans télévision et ou pou rode imite li aussi ; ou pou rode faire couma li dans tous so acting ki li faire, ou pou imite li.

Commié la caze ou trouve sa mauvais l'effet de télévision, so mauvais coté kot ene fille musulmane tellement content guette film et tel acteur Indien ou Européen kot résultat de sa, finalement fille musulmane là sauver avec ene garçon Indien, alle faire le tour difé ou bien marier avec ene Européen dans l'église, renonce complètement So religion l'Islam. De l'autre coté, ou zenfant kan li pé jouer avec les zot camarades, li dire : « *Moi, mo Rambo, ou sois mo Spiderman ... ou tel, tel acteur* ». Zenfant là conne la vie so acteur préférer par cœur. Tous sa, ki faire ? So raison, c'est juste l'effet Télévision. So lé temps pé fini devant télévision, guette toute sorte qualité film. So ti l'âge li pou chante, chanter ki so acteur préférer chanter dans so film et li pou rode danser couma so acteur préférer. Parfois ou tanne bane chanter kot fine mentionne nom Allah et So prophète et même dans bane films, bane artistes mentionne bane attributs d'Allah, ou même le credo de l'Islam, sans zot conne valeur et grandeur de *Credo* de l'Islam et le *Tawheed* et ena bane soi-disant musulmans bien attirer avec sa, trouve sa ene grand zaffaire.

Donc si ou demande sa zenfant là ki li conner concernant la vie du prophète (saw) ou bien la vie de bane *Khulafa-e-Rashideen*, ou bien de bane *Sahaba* ? La réponse zéro ! So le cœur sitan fine attacher avec so acteur/ actrice, jusqu'à ki li toujours pé saryer zot photo ensemble avec li dans so porte monnaie. Li malheureux ki azordi jour ou dire ene jeune récite Namaz par cœur, li pas conne so Namaz. Moi-même personnellement, mo fine déjà dire ene ti jeune gens de 18 ans donne *Azaan*, li pas conne donne *Azaan*, li pas conné couma faire *Wazou*, mais dans so la chambre grand l'écran télévision (appelle sa : Home Cinéma) avec toute sorte qualités film de so idole.

Ya Allah, kot nous bane jeunes dans l'Islam pé allé ! Ki travail bane Mullahs et bane responsable du *masjid* pé faire pou amène sa bane jeunes là dans *masjid*. Au lieu faire travail ki bizin, zot pé la guerre entre zot sa bane Mullah là, pé rode grandeur, et tous travail Deen ki zot faire c'est *paisa* (l'argent) pou faire ene Nikah, ou sois zot alle lire kot gagne *Mayyat*, amène boucou innovations dans l'Islam pou zot l'intérêt personnel et la plupart de sa bane musulmans là alle croire dans zot et donne zot bel l'importance.

L'Islam c'est ene religion complète par Allah (swt), et le Saint Prophète (saw) li ene model parfait pou nous dans chaque l'aspé de nous la vie : ene model pou nous l'intérieur, aussi bien ki nous l'extérieur. Quant à Télévision, li faire nous sous-estime la mode ki le Saint Prophète (saw) fine amène pou so Ummat, et faire nous content la mode de bane acteur/ actrice. Et li pas ene

exagération si nous dire ki Télévision fine faire des certaines parmi nous gagne dégoût pou mode de vie de nous bien-aimé prophète (saw).

Guette l'habillement de nous bane jeunes, chaque nouveau la mode ki apparaitre lors l'écran, lendemain li présent parmi bane jeunes garçons et filles musulmanes. La mode là capave ridicule, bouffon, ou bien indécent, là aussi musulmans là pou suivre. Bataze *Aashiqi*, robe *Dil to Pagal Hein*, la queue cheveux pareille couma la queue tourner, karabi près pou touche menton. Zongles couma dire griffes, la chaîne couma la chaine li chien dans li cou Baracouda. Cheveux couma Madonna, la tête fine passe tondaize deux coté couma dire ene bol lors la tête. Sa bane zaffaire là ki zot pou suivre, même si ena pou dépense boucou l'argent pou imite zot idole ! Sa aussi *Shirk* et si ou dire zot dépense ene ti peu dans le chemin d'Allah de céki Allah fine donne zot, toute suite zot pou réponde, nous péna, kot nous pou alle gagner ? Zot refuse pou dépense dans le chemin d'Allah kot pou faire travail ki Allah (swt) fine ordonne pou faire. Bien Malheureux ! Ki conte sa qualité dimoune là pou render kot Allah, le jour ki li pou présenter devant Allah ? Kot sa jeune musulman là ki pé quitte so la barbe avec toute humilité et *Imaan*, ki li ene suivant du Saint Prophète (saw) et li ene musulman ? Kot sa jeune fille ou madame musulmane là ki pé couvert so le corps d'après la loi d'Allah ki fine prescrire dans le Saint Coran avec ene la foi ferme ki li pé préserve so beauté juste pou so mari?

Donc, l'Islam c'est ene religion du respect et Allah (swt) fine ordonne nous pou couvert nous le corps dans ene façon respectable afin ki tous les autres dimoune respecter nous. Donc guette mauvais l'effet ki télévision apporter avec plusieurs de so bane senne avec bane mauvais films kot sa pé amène nous, nous bane zenfants et madames loin avec l'enseignement de l'Islam.

Faute de temps, *Insha-Allah* vendredi prochain mo pou continué lors même sujet là.